

四庫全書

史部

欽定四庫全書

史部
廣西通志卷三十七

詳校官給事中臣鄧文泮

檢討臣德生覆勘

總校官進士臣朱鈐

校對官中書臣李荃

謄錄監生臣徐天駿

欽定四庫全書

廣西通志卷三十七

學校

書院附

學校育材之地也

聖朝重熙累洽棧樸菁莪之化遍被陬澁無在非夏絃
春誦矣哉

皇上御極以來尊崇先聖禮隆亘古

訓飭多士篤摯周詳尊所聞行所知三江五嶺間當不

乏四科之選出而翊贊昌時不負

朝廷風厲學宮意也寧僅陟降陳獻春秋修釋奠釋
菜己乎書院昉自石鼓既稱鹿洞粵地如宣成柳
山相沿創置今特奉

敕於省會建興學舍酌籌膏火資藏修其地者惟實之
務而不徒矜其名則於人文化成之道益新矣志
學校

桂林府

府學舊在獨秀山下唐大厯中觀察使李昌巖因
顏延之讀書堂址建宋熙寧中遷城東南隅乾道
二年燬教授江文叔請於經畧使張維遷於城西
故始安郡址張栻為記淳熙中栻知靜江府始擴
大之朱熹記嘉定十年提刑吳純臣刻釋奠牲幣
器服圖有記元至元十三年燬於兵嶺南帥史格
定海隅還重建大德初魯師道復以釋奠圖墨本
鐫石樹於明倫堂臧夢解記至大三年副使余璉

置大成樂器四年總管梁國棟闢殿之東地為節和堂以習樂天歷元年教授辛龍應於堂之前復葺肅容堂為更衣所延祐七年廉訪使薛元直于思何德嚴建奎文閣以藏書籍至元四年副使別多喇卜丹總管馮夢弼等議新殿宇之圯壞者廉訪使托音等相繼來任遂建禮殿戟門兩廡更先聖先師十哲從祀像王庭弼記補祭器益禮服明年復建東西齋梁遺記至正元年春廉訪使多爾濟巴

勒副使趙天綱都帥章已延撤而新之十三年冬
十月副使額爾吉納重修殿廡堂宇閣舍茶陵劉
三吾記季年漸就圯毀舊有七先生祠在戟門西
初扁曰三先生祠祀濂溪明道伊川大德三年副
使臧夢解重修增祀晦菴橫渠南軒東萊因易其
額并列鄉賢於左右史格祠建在肅容堂之東至
是亦敞於風雨明洪武八年撤肅容節和二堂及
教授堂更衣亭建察院署十四年始創東西四齋

十五年布政使李延中重修禮殿兩廡二十四年
監察御史李默與藩臬僉議重建明倫堂增置膳
堂號房教授陳璉記二十六年冬頒雅樂加六佾
之舞陳璉作大成樂賦三十一年春重修東西廡
嚴聖賢像宣德中漸頽知府孫鼎修葺正統九年
知府吳惠重修譚壽海記十二年御史曾蒙簡建
立本省登科題名碑弘治十三年巡按御史袁佐
重建明倫堂彭甫記正德十二年巡按御史謝天

錫重修大成殿嘉靖十年奉制始易文宣王曰至
聖先師易大成殿曰先師廟易神像為木主建啟
聖祠於先師廟後陳伯獻記建敬一亭於明倫堂
前植御製敬一箴及視聽言動心箴凡七碑又立
名宦鄉賢二祠列於左右萬曆九年督學袁昌祚
重修甬道丹墀俱砌以石

國朝康熙十一年巡撫都御史馬雄鎮移建迤西廟
宇祠閣堂廡泮池咸鼎新之地兼縣學舊址邑人

李崇記孫逆叛學宮為兵舍殿廡頽圯二十一年
教授高熊徵詳請巡撫都御史郝浴布政使顏敏
按察使黃元驥提學道王如辰右江道簡上知府
徐鳳鳴捐貲重修有記二十五年

聖祖仁皇帝御書萬世師表頌行州縣懸額廟中四十一年

御製訓飭士子文鑄石建亭於大成殿月臺之東

御製四配贊頌行各學鑄石明倫堂六十一年巡撫孔毓

均捐貲備造祭器悉依闕里規制雍正元年奉

旨追封孔子五世祖木金父公為肇聖王高祖祈父公
為裕聖王曾祖防叔公為詒聖王祖伯夏公為昌
聖王父叔梁公為啟聖王改啓聖祠為崇聖祠按
昭穆位次安設神牌每年春秋致祭其牲牢酒醴
籩豆簠簋每神位前各照啟聖王例陳設三年

御書生民未有匾音頒行各學懸額廟庭四年巡撫汪
漉布政黃叔琬按察甘汝來驛鹽道張若需各捐

俸改建明倫堂並修東廡及東廡神牌六年巡撫
金鉞重修殿廡戟門及名宦鄉賢二祠九年巡撫
金鉞布政元展成署按察事耿鱗奇桂林知府錢
元昌詳議重建大成殿覆以綠瓦門廡宮牆之屬
率皆鼎新

學田原額一頃零四分九釐有零除荒外實徵九
十四畝零額徵租米三十石零二斗零

宣城書院舊在今府學之西宋景定三年經畧使

朱禩孫建祀南軒張宣公栻東萊呂成公祖謙理
宗敕賜匾額後燬元元貞中重建至正三年重修
明初改為臨桂縣學正統五年御史劉嵩復建於
縣學西弘治十七年提學姚鎮移建府縣二學之
間正德中右布政使翁茂南按察使宗璽叅政黃
衷副使傅習張祐各捐俸重修置祭田三十畝陳
伯獻有重修立田記明末復廢

國朝康熙二十一年教授高熊徵具詳巡撫郝浴以

譙樓右線伯花園故址改建書院奉祀宣成二公
召集各屬諸生肄業其中督學王如辰改名華掌
以後遞有修葺雍正二年巡撫李紱復題曰宣成
書院捐俸給餼延師課士

棲霞書院即阜成書院在東江門外

國朝康熙五十六年巡撫陳元龍建雍正九年巡撫
金鉷率屬鳩貲重修更名棲霞布政使元展成書
額

秀峰書院雍正十一年奉

旨令各省會建造書院俾士子為肄業所并賞銀一千兩籌息以資膏火乃擇地於城東傅疊綵面秀峰之勝中為書廳最後為寢室前為講堂五間東西廂學舍各十五間

愛日書院在鳳凰街中康熙五十八年士民為巡撫陳元龍建

流恩書院在府學宮之東雍正十年通省士民為

總督鄂爾泰建

桂林書院在府治西明嘉靖三年巡按御史汪淵
建今廢

灘江書院在文昌門外明天啓間督學曹學佺建
今廢

附武學在城西麗澤門內明嘉靖九年提學僉事
黃佐因舊武學廢址狹隘遷建於此蔣冕記今廢
射圃在麗澤門外依城為之今廢

臨桂縣學元以宋貢院改建皇慶間縣令劉鼎遷於郡城南隅明洪武二十八年遷府學右宋宣成書院故址正統十年巡按御史周紀重修有記十三年巡按御史曾蒙簡檄建兩廡御史尹鉉復檄修建兩齋有記正德元年提學僉事姚鏌重建大成殿及堂齋邑人包裕記萬歷二十四年遷古田縣講堂舊址明末廢

國初春秋二祭附於府學康熙二十四年改建於府

治南譙樓西本前靖江王宗室故宅後為線伯衙署知府黃良驥知縣張遵教授高熊徵詳請改為縣學形勢聳秀正殿巍然兩廡及戟門櫺星門次第修舉雍正元年知縣湯大瑜奉文改換崇聖祠額添設神牌祭器

忠義祠

國朝雍正元年知縣湯大瑜建於學宮內

節孝祠在十字街即舊天主堂知縣湯大瑜詳署

巡撫韓良輔改建

學田原額一十一頃七十六畝二分七釐零除荒
外實徵八頃三十畝一分零

附

義學在寧遠門內康熙二十四年知縣張遼建
五十四年巡撫陳元龍檄創義學十七處有記事
詩雍正九年巡撫金鉷檄知縣駱為香於東南西
各圖增復義館二十處延塾師聚童子教讀歲給
脩脯十年檄桂林同知徐德秩在拱辰門外增立

義學一所

社學一在寧遠門外富義橋下一在西鄉兩江口
明萬厯間建今廢

靈川縣學舊在縣西一里宋建炎間建後圯元至
元二十一年知縣羅羸遷於縣東南大象山尋燬
於兵二十九年廩訪副使趙天綱命知縣岳璋遷
建於縣東街明洪武三年知縣劉延重建十八年
知縣呂資增置東西齋及堂膳廚庫造祭器塑聖

賢像永樂乙酉知縣劉正言復修宣德己酉知縣
陳繼廣其基重建明倫堂講堂正統甲子知縣包
至道重建大成殿兩廡修祭器成化元年知縣曾
鐸擴地為門十八年知縣沈溥重修嘉靖三年知
縣秦有重修十三年教諭陳璇請改建廟學巡按
御史曾守約發公帑檄通判伍重董其役十九年
知縣成世遠加修殿廡門舍

國朝康熙二十一年知縣黃士塗訓導毛文燦重修

五十年知縣李天榮因通邑諸生議學宮地勢卑濕請改建城南門外始遷高峰有碑記五十五年知縣樓儼續建櫺星諸門雍正元年通學公修禮門義路以磚易之知縣鄭采宣奉文改換崇聖祠額添設神牌祭器並修殿廡五年知縣牟泰齡捐俸重修殿廡祠宇並置鐘鼓有碑記

明倫堂在東街舊學址東元至元二十九年知縣岳璋建

國朝雍正三年訓導劉世瑛修並圍牆頭門

忠義節孝二祠知縣鄭采宣奉文建於學宮內外
學田共三頃三十五畝零

附義學一所在北街

國朝康熙五十五年知縣樓儼創建有記

興安縣學舊在縣北門右宋嘉泰間遷於縣北朝
天門歲久漸頽景定五年縣令蒲應龍修葺之增
學田置貢士莊李應春記元至元間遷於縣治東

門外至正間縣令劉侯得陟江空地置學校新莊
唐光記明成化間都御史韓雍遷於城內方昇記
弘治四年知縣鄭普修萬厯九年守道彭富二十
二年知縣吳彰俱重修

國朝康熙二十一年知縣栢嵩琪訓導蕭露融五十
五年知縣任天宿教諭何器訓導蘇廷章俱各重
修雍正元年奉文改換崇聖祠額添設神牌祭器
九年知縣王勛捐貲倡率通邑紳士度地於縣署

西正殿兩廡崇聖名宦鄉賢祠明倫堂悉皆鼎建
忠義節孝二祠在城東門內雍正三年知縣楊朝
璘建

學田四頃二十畝零在四鄉額徵租銀二十二兩
七錢三分

附義學在振武門內

國朝康熙五十六年知縣任天宿建雍正九年知縣
王勛重修

陽朔縣學舊在縣西宋淳熙十四年遷於縣東即
今址元延祐乙未邑宰嚴敬重修廟宇廊廡齋舍
學左創立文會堂明洪武十三年訓導龍騰修建
大成殿戟門堂廡齋舍又構讀書樓正統四年教
諭蕭文郁建鄉貢題名碑十年知縣萬霖重修殿
廡櫺星門及觀德亭會饌堂號房吳惠記天順甲
申水圯成化十五年知縣楊綱重建明倫堂讀書
樓鄉賢名宦祠弘治十七年巡按御史顏頤壽提

學僉事姚鎮知縣黃祐重修嘉靖二十一年知縣
王時中修殿廡門堂三十六年府同知張冕以審
戶口至縣重修四十三年知縣吳國用修廟廡堂
祠又於讀書樓改建五雲樓萬厯九年府推官李
道先署縣事修造殿廡戟門及進德修業齋二十
三年知縣李栻造明倫堂崇禎十三年知縣朱奉
鑲重修殿廡戟門櫺星門及明倫堂敬一亭立卧
碑鄉貢題名碑

國朝康熙九年知縣陳洪疇重修正殿戟門兩廡明倫堂啟聖祠二十年知縣韓述曾重修六十一年知縣胡式瑗捐俸修葺正殿中建暖閣蔽以帷帳雍正元年教諭胡榮改換崇聖祠額添設神牌祭器五年知縣李符恭重修

忠義節孝二祠在縣城東

國朝雍正四年署縣事王廷獻建

學租額解銀四十六兩零二分四釐

曹公書院在縣治北鹿山下本曹祠部故宅後即其址立書院尋廢為慈光寺明洪武初復建於寺內正統間重割寺三分之一至成化辛卯知縣楊綱盡撤寺宇前建行臺後造書院教諭黃璋記後廢

附義學六間在明倫堂前雍正二年知縣侯靖建永寧州學在州治北舊古田縣學址在州南宋紹興間縣令高登闢而新之明洪武間重建成化初

縣治沒於猺獞諸生從司牧建講堂於會城後改
為臨桂縣學隆慶四年巡撫都御史殷正茂奉詔
大征恢復古田縣尋改為州學增廩增各十人以
待本地入學者五年知州唐執中始建廟於城東
南陬萬曆五年知州鄭應齡議建堂廡齋舍八年
知州尹廷俊上其議於院司府乃相吉於城西北
新擴基址規制始備陳一洙記二十五年漸圯知
州徐來聘復請新之有記三十一年知州林裕陽

重修天啓元年知州萬建元造祭器重加修葺羅之鼎記明末顏圯

國朝康熙二年知州白意上狀院司捐資重建鄉人李常記十一年城內外火延燬啟聖祠是年冬知州朱王造重建復繚垣牆二十二年知州郭大琦二十四年知州遲圻四十五年知州朱璵俱重修雍正元年知州崔傑奉文改換崇聖祠額添設神牌祭器

學田額徵學租銀一十八兩五錢

附義學在城內西北

國朝康熙二十四年知州遲圻建雍正七年知州陳嘉穀重修

永福縣學舊在縣前儀鳳鋪宋淳熙六年遷於縣東北鳳巢山下即狀元王世則故宅明洪武二年縣丞康孝良重修永樂十四年知縣鄭曦景泰四年知縣黃瓊教諭葉轍俱經重修後毀成化十六

年知縣夏忠重建大成殿復圯嘉靖二十一年知縣林天榮重建聖殿兩廡戟門櫺星門東名宦西鄉賢祠後明倫堂又建敬一亭東西時習日新齋興賢儒學二門教諭訓導解舍及卧碑敬一六箴皆備萬厯十五年知縣吳立東重修增建啟聖祠國朝康熙二年知縣黃朱鼎重建二十五年知縣陳以遠三十八年署縣事桂林通判吳中朗各重修雍正元年奉文更換崇聖祠額添設神牌祭器

忠義節孝兩祠雍正四年知縣張夢白建

附義學縣舊未建設

國朝康熙三十八年署縣事通判吳中朗於城中擇地創建瓦屋三楹

義寧縣學先在縣南宋經畧使張栻大書門扁刻於石咸淳庚午以地僻遷香林寺東元元貞元年知縣臧仲璧遷縣西明洪武四年縣丞丁勝重修天順中燬越五年知縣鄭勝復修正德十六年知

縣梁順重修萬厯二十四年知府洪澄源檄縣重修兵燹後祠廡堂閣齋舍俱毀止存正殿

國朝雍正元年奉文改換崇聖祠額添設神牌祭器
三年知縣袁宗佺草創兩廡戟門七年知縣許建
同儒學紳士次第捐建櫺星門泮池宮牆八年捐
造明倫堂

忠義節孝兩祠

國朝雍正三年署知縣鄭登瀛建

學田二十六畝九分額徵租銀四兩五錢六分

全州學始於宋慶厯四年舊基在州城東北隅紹興十三年郡守高楫創建於鳳凰山之陽即今地劉岑有記嘉定間教授黃學行建登科題名碑有記元至正八年燬於獠十年郡守石亨祖重建揭傒斯記明洪武六年郡守章復以舊明倫堂狹隘徙創於大成殿後堂齋射圃一新宣德九年知州周健復修又創尊經閣以貯書籍改鑿泮池於戟

門前作步雲橋於學之南吳伯璋瑞芝記正德癸酉知州顧璘重修又因全寧樓故址建翔鳳樓後按察副使劉節建名宦鄉賢祠於學之西南俱蔣冕記嘉靖九年奉詔建啟聖祠於學西又建敬一箴亭於學北萬厯以後屢圯屢修泰昌元年知州邵穎達修

國朝順治十八年知州高一治重修尋圯康熙二十年知州徐泌倡紳士捐修巡撫都御史郝浴入境

謁廟捐資助修二十六年署知州魏錫曾修五十
一年大成殿圯知州沈元佐重修逾年復頽雍正
二年知州張學林詳請修建捐俸以倡紳士三年
七月殿廡戟門及崇聖祠俱皆落成復添設神牌
祭器督學陸紹琦記

忠義節孝二祠雍正三年知州張學林就學宮內
外隙地建

學田九十四畝三分有零徵租銀一十四兩零七

分五釐有零

清湘書院在北門外二里柳山即宋刺史柳開讀
書故址嘉定八年郡守林岳增置講堂齋舍寶慶
元年郡守程榆奏請賜額三年郡守趙必愿創率
性堂燕居樓於柳侯祠北魏了翁記元初毀於兵
至元貞間總管耿大節重建元統癸酉郡守柳宗
監復新之有記明永樂九年指揮彭舉知州韓忠
修孔子燕居堂柳侯祠設杏壇建育德詠歸二亭

宣德癸丑藩臬檄建講堂天順甲申僉事袁凱重修仍訪遺跡作亭宇十為士子游息之所年久圯壞成化間州守汪鏞重葺有記正德間又圯州守顧璘再新之益增亭榭張燦記厥後仍廢

國朝康熙二十六年知州崔廷瑜因故址隙地重建屋舍更名柳山

璜谿書院在恩鄉元至正七年建有先師遺像碑存焉明正德九年重修今廢

湘山書院在湘山寺東堂曰培桂明嘉靖九年督學黃佐建今廢

明經書院在建鄉

鳳坡書院在州署右西坡明末邑人建以祠去牧王國相者兵燹後久圯

國朝康熙五十七年邑紳蔣弋倡修雍正三年知州張學林即其處設社學延師課授

灌陽縣學隋大業十三年建在縣治東宋崇寧中

以其地隘遷於西門外去城一里許建炎三年司
教范昂仍遷於縣治東熊詢有記淳熙九年縣令
趙永以崇寧舊址厥土爽塏襟抱環密復遷而西
余元一記嘉定辛巳癸未間郡守蕭一致楊若縣
令洪若水節次重修陳德一記元泰定四年達魯
噶齊輝圖縣尹董貞重修趙文蔚記至正十七年
達魯噶齊兼勸農使巴雅爾氏玖珠重修孔思坦
記明洪武元年知縣王友裕重修袁誠仲記正統

二年知縣馬驥重修張蕤記
成化二十三年知縣
劉麓重修陳瑤記
嘉靖二年副使楊必進行部謁
廟以學在城外荒僻卑隘委知縣周應祿典史柳
端和監生張鑑耆老呂釗等仍遷於縣治東舊址
創建聖殿兩廡戟門櫺星門泮池橋規制始備蔣
冕有記
萬歷二十七年知縣夏之時重修天啓二
年知縣梁鏤重修蔣士忠記

國朝順治十八年知縣陳登瀛重建明倫堂康熙二

十一年署訓導朱雲倡修聖殿檢蓋塗飾督學王
如辰為記二十三年署縣事布政司照磨趙光勗
重修兩廡戟門唐納牖記二十四年知縣陳一朋
重建啓聖祠雍正元年改換崇聖祠額添設神位
祭器

忠義節孝兩祠在東城內

國朝雍正四年知縣張舜緒建

學田一頃零九畝一分額徵租銀八兩六錢一分

零

附義學在東門內

國朝康熙五十八年知縣趙成章建并置義田五十畝以資膏火

社學四所東為文昌南為義和西為興賢北為朝元今俱廢

平樂府

府學宋舊址在城東二里考槃澗之西宣和間知

州嚴以諷徙城內州治東淳熙中太守王光祖復徙舊址元初燬於兵前至元己卯郡監劉懷遠知州孫武德經營創始越壬午武德之子夢德再知州事乃繼成之後圯至正二十四年攝政拓跋元善重建又立進士題名碑常挺記明洪武間知府李誼增建厨庫宣德十年知府唐復增新殿堂蔡雲翰記正德十年知府張愷重修嘉靖四年知府李彥徙建城西鳳凰山麓萬曆七年叅政陳應春

擴學前後地建敬一亭鑿泮池十九年知府黃文炳重修正殿前為戟門櫺星門後為明倫堂堂西為啓聖祠兩翼為齋最後為尊經閣名宦鄉賢祠分附於東西廡前崇禎末盡燬

國朝順治十六年知府王延禔始建明倫堂十八年建大成殿悉出草創康熙九年知府楊榮蔭知縣陳光龍捐俸倡修并建兩廡櫺星門戟門廟貌庶幾復古甲寅後兵燹荒圯二十年署知府婁倣舜

修建明倫堂啓聖祠并殿廡門垣葺而新之巡撫
麻勒吉記三十年知府陸鍾呂重修五十年知府
柯鄧牧增置祭器五十七年知府慕國典修理殿
廡及兩門并全備祭器祭桌雍正元年奉文改崇
聖祠額添設追封五世王爵牌位并祭器

學田七頃一十九畝共徵租銀七十三兩九錢八
分有奇

道鄉書院在北關外嘉靖六年兵備副使李如圭

於途中得井欄石視之乃道鄉書院斷碑不知建
於何地廢自何年爰以此石貯之學宮作詩紀焉
九年提學道黃佐屬知府龍大有重建以祀鄒浩
贊善張治有記萬厯間改為七賢祠

國朝康熙六年巡道胡朝賓改為訪賢書院通政袁
景星有記今仍為七賢祠

新道鄉書院在北門內鳳凰山麓

國朝康熙四十九年知縣黃大成以舊道鄉書院既

改為七賢祠乃擇地創書院專祀道鄉先生兼設義學五十六年知府慕國璵捐貲修葺

三渠書院在北門外康熙三十一年建

敬業書院在塘背菴旁今廢

明賢書院在府前今廢

平樂縣學址在城北明洪武四年知縣高忠創立永樂二年知縣陳應文重修二十年推官鄒寧復修楊懋記正統元年知府唐復重建弘治間為水

衝圯知府謝瑚改附府學合祀正德間生徒亦隸
郡庠萬曆三十四年知縣陳御墀詳允改南門內
明賢書院建復之唐世堯記崇禎末仍附府學自
後兵燹頻仍未遑修創營弁改造衙署

國朝康熙四十二年知縣孫成已同教諭唐樞於舊
基重建殿廡戟門櫺星門及祠宇四十四年知縣
彭象晉修建大成門敬一亭宮牆五十年知縣黃
大成開浚泮池建芹香橋製造祭器雍正元年奉

文改換崇聖祠額添設神牌祭器四年知縣吳元鉞修

忠義節孝兩祠一在學宮右一在北城外

國朝雍正三年知府胡醇仁通判呂成章知縣吳元鉞同建

學田四頃二十四畝九分零租銀四十七兩八錢六分有奇

附義學在城內北新道鄉書院內康熙四十九年

知縣黃大成建

社學二一在西門外塔街一在府儒學左今俱廢
恭城縣學舊在縣治東南鳳凰山明永樂八年建
成化十三年遷縣治知縣夏瑋改建於縣治西學
後山有澤涌流知府楊冠鑿池引水入焉名曰洗
硯池正德九年叅政蔚春知縣陳猷開基重建十
三年兵備副使張祐建騰蛟起鳳二坊於東西櫺
星門外嘉靖三十九年知縣楊鈞遷於縣西南隅

殿堂齋廡歲久圯廢萬厯二十年知縣任思申請
修建啓聖祠明倫堂堂左右建進德修業二齋及
泮池戟門諸制皆備然俱用葦織易圯三十年知
縣陳朝策重修盡易以磚天啓五年知縣張汝醇
重修經兵燹荒毀

國朝康熙九年知縣曹林韻修建聖殿兩廡啓聖祠
尋復圯僅存聖殿二十年知縣揭宗本修建兩廡
戟門啓聖祠三十九年知縣田慕芳重修殿廡四

十五年教諭封安邦增修櫺星門濬泮池並建尊經閣於殿右雍正元年奉文改換崇聖祠額添設神牌祭器

忠義祠在櫺星門右節孝祠在梓潼觀左雍正三年知縣方顯建

學田二頃六十三畝每畝折租不等該銀二十一兩八錢一分

附義學在明倫堂左側康熙五十七年知縣王沂

建

社學舊在北鄉常家村後為鎮峽寨巡檢司康熙五十九年知縣王沂建於縣東

富川縣學初在縣治西南隅一里明洪武二十九年建成化四年知縣韋忠重建表衷記弘治二年知縣劉時雍復修周孟中記正德元年督學姚鏌徙建城北隅迎恩坊以知縣張冕董其事嘉靖間通判鄧輅易櫺星門以石教諭徐一瀚鳩工鑿泮

池邑人張惠記二十二年知縣陳東重修萬厯九年知縣周篤棊重建汪若水記三十五年知縣張文耀教諭張翊捐置學鋪學田

國朝順治十四年知縣雍恭重建康熙四年知縣張鵬翼修十一年知縣劉欽隣教諭顏以莊重修五十二年知縣梁子豹五十三年署知縣王沂五十五年知縣王淑京各重修殿廡門池及啓聖鄉賢祠明倫堂雍正元年知縣韓三善奉文改換崇聖

祠額添設神牌祭器

忠義節孝二祠在城北門內

國朝雍正三年知縣韓三善建

學田七十七畝一分零徵租銀一十一兩五錢五分有奇

江東書院在城北六十里宋嘉定十四年澹然居士毛基建有記

賀縣學舊在縣治東宋郡守鄧璧建元至正初郡

守劉晉修十六年燬郡守孫逢辰再創殿廡門堂
明洪武十年因舊增飾永樂十三年主簿傅岳教
諭李滋重修成化四年知縣蔣智訓導馬超撤而
新之知府袁衷有記嘉靖二十三年知府姜樛教
諭李文貴遷南門內玉虛觀地二十六年教諭毛
純砌泮池三十六年縣丞石汝礪磚砌櫺星門萬
厯甲午知縣翁懋勲大修殿廡堂齋培土增高地
基三十一年邑紳毛翊修名宦鄉賢祠三十四年

署縣事推官周伯遜修復歲久傾圯崇禎元年知縣鄭伯龍修有碑記

國朝康熙九年知縣何標教諭劉懋沛建復齋署二十四年知縣趙璧三十四年知縣翟鴻儀俱重修雍正元年奉文改換崇聖祠額添設神牌祭器七年知縣史凌修殿廡十年復修崇聖祠建明倫堂忠義祠在學宮前節孝祠在縣治前

國朝雍正二年知縣黃為漢建

學田四頃九十六畝六分五釐額徵租銀三十七兩三錢九分零又水東學舖五間原額租銀一十一兩九錢三分後圯存舖地召佃自結茅宇徵租銀二兩五錢

附義學在城外水東亭子

國朝康熙二十四年知縣趙璧捐俸建

社學二一在城東一在信都鄉

荔浦縣學舊在縣東南宋徙縣西元至正己丑主

簿石天岳重修明洪武初知縣馬宥重建景泰六年知縣伍繪改遷縣城移建於城內西萬曆十二年知縣呂文峰重建殿祠堂齋兵燹頽毀唯明倫堂尚存

國朝康熙四年知縣錢周鼎重修甲寅孫逆變燬於兵二十二年知縣王友夔改遷於縣城之南廂建大成殿啓聖祠櫺星門殿依城址高學址稍下每雨則積水當殿而出歷年既久漸就傾塌四十

二年知縣馮千英捐修倡率生童鳩工庀材培圮
增闢開溝洫鑿泮池甃甬道拜臺建禮門義路尋
又傾塌四十八年知縣許之豫修葺五十八年教
諭馬振先遷建於縣東南濱江舊址捐貲建造大
成殿兩廡戟門櫺星門開泮池築宮牆建啓聖祠
及名宦鄉賢祠明倫堂規模大備雍正元年奉文
改換崇聖祠額添設神牌祭器

忠義節孝二祠在城南

國朝雍正三年知縣姜濟奉建

學田二百畝每畝租銀七分二釐共徵銀一十四兩四錢

附義學在城南康熙四十七年知縣許之豫捐建
修仁縣學舊在縣東關外明成化間築城遷於城
內縣治東後再遷南門外明末知縣朱晉明遷於
城南郭外初創聖殿一座值兵燹尋圯

國朝順治十二年署縣事高際運仍遷建城內舊址

康熙八年知縣李子實建啓聖祠築土牆鑿泮池
十一年知縣陳錫疇復修十三年後毀於兵十九
年署縣事王用詠署訓導莫顯璋修建殿祠櫺星
門宮牆儀門二十五年知縣金之桂建明倫堂三
十六年知縣劉灝捐貲重建櫺星門又鐫

御製顏曾思孟四子讚立石儀門四十三年署縣事荔浦
知縣馮千英訓導鄭奕履典史秦得璽倡率重修
東西兩廡復建名宦鄉賢祠雍正元年奉文改換

崇聖祠額添造神牌祭器二年知縣傅峻修名宦鄉賢祠七年署知縣金澤茂修大成殿戟門

學田八畝八分四釐每畝租銀五錢二分零共徵租銀四兩六錢五分有奇

昭平縣學明萬厯三十四年知縣冷茂松修四十四年知縣柯壽愷復修

國朝康熙元年知縣陳定國始移建於縣治西二十二年知縣趙金章重修五十六年知縣馬尹移建

南門外五十八年知縣錢兆澧繼修雍正元年奉
文改換崇聖祠額添造神牌祭器

忠義節孝兩祠一在學宮內一在昇平街雍正三
年知縣錢兆澧建

學田一頃二十一畝五分三釐零每畝租銀一錢
共徵銀一十二兩一錢五分有奇

永安州學舊在城內州治西明成化間都御史朱
英委叅議謝綬創立陳獻章記嘉靖間燬知州楊

鈞重建萬厯四年遷南門外三十七年知州王汝服重修唐世堯記明末被兵毀

國朝康熙五年知州鄧林尹重建聖殿啓聖祠兩廡戟門櫺星門自為記十一年知州何呈秀修建明倫堂文昌閣後遭逆變傾圮殆盡十九年知州丁亮工重建王如辰記雍正元年奉文改換崇聖祠額添造神牌祭器

忠義節孝兩祠在學宮東

國朝雍正三年知州任琳建

學田二十九畝額徵租銀四兩零六分

附義學

國朝康熙二十年知州丁亮工即尊經閣下創設四十八年知州陳大輦擇隙地於州署右重建自為記祀徽國文公於中顏曰眉江書院雍正二年知州吳琦九年知州陸琛俱重修

梧州府

府學在府城外東宋元祐中知州張唐輔建於永井泉北建炎三年知州文彥明遷於放生池南紹興二十二年知州任詔以神霄宮廢址改創洪邁記元至元二十四年總管馬麟重建明成化十年都御史韓雍營創中為文廟東為啓聖祠前為兩廡又為戟門外為泮池跨以石梁左為神厨右為神庫東西各有碑亭又前為櫺星門舊府縣學各有文廟乃併而一之正殿左為府學明倫堂下為

四齋東進德日新西修業時習前為儀門外東為
教授署西為諭訓二署前為儒學門正殿後為縣
學明倫堂下為二齋東致知西力行前為儀門外
為諭導二署前為儒學門丘濬記弘治十年都御
史鄧廷瓚以門地卑潦輦土築高六尺許石甃其
外又易櫺星門以石柱廟宇堂齋悉因舊制益修
之李東陽陳獻章記正德十年建名宦鄉賢祠嘉
靖八年敕建敬一亭於學宮十二年都御史陶諧

復新之二十年都御史蔡經交南功成以學宮振
旅獻馘宜壯麗始建尊經閣購書籍與敬一箴並
藏毛伯溫記萬厯八年知府陸萬垓十五年知府
林喬楠相繼重修四十七年知府陳鑑復修天啓
二年蒼梧知縣梁子璠修縣學明倫堂

國朝順治四年總兵李成棟自粵東發兵入梧城廟
宇祭器悉燬十三年知府張繼曾率紳衿創建十
五年推官閻玫建戟門康熙二年知府黃龍建兩

廡修櫺星門十一年知府楊彥溶重修正殿撤舊
柱易以杉材建尊經閣於殿後舊址甲寅兵燬十
九年知府蘭佳蔭捐貲重修建設神主龕座殿東
建啓聖祠有東西廊舍祠之左為明倫堂堂儀門
之右為敬一亭闢土繚垣殿閣門堂丹雘一新二
十一年冬署知府事何炯署教授黃裳吉續工捐
修玉如辰記二十二年知府彭騰翹知縣尹維旆
重修戟門二十四年知府陳天植修櫺星門四十

六年知府李亨時重修宮牆五十七年知府范大士修櫺星門啓聖祠尊經閣明倫堂雍正元年知府徐嘉賓奉文改啓聖祠為崇聖祠添造追封五世王爵神牌並祭器八年知府袁璣修明倫堂本年知府吳士鯤倡修兩廡鄉賢祠尊經閣十一年署府徐德秩倡捐修建崇聖名宦二祠并遷建明倫堂於學宮東南

學田原額四頃五十畝共租銀一十兩零五錢九

分零懷集縣徵解又原額店舖八間共租銀七兩
四錢今除傾頽四間實徵銀二兩零二分本學徵
解

迴瀾書院在東門內因蒼梧縣舊義學基址

國朝康熙三十五年知縣劉以貴改建為茶山書院
四十六年知府李亨時於內建緇林閣四十九年
知府李世孝復建文昌祠魁星樓講堂學舍更名
迴瀾置田稅米一十五石有奇永為士子費給雍

正三年知府徐嘉賓捐俸修葺延師講學巡撫李
紱更題曰傳經有記尋圯八年知府吳士鯤重修
緇林閣十二年知府徐德秩於閣旁興建學舍三
十餘間重建文昌閣仍更今名

觀瀾書院在南薰門外係陳公祠舊址為營兵所
據

國朝傅將軍修作住宅後復轉售康熙二十五年知
府陳天植捐俸買復改建為諸生肄業所

萊漪書院在桂江西岸白鶴觀前明成化間都御史韓雍建今廢

東湖書院在府城東門外漫泉亭東郡人吳廷舉建今廢

梧山書院在儒學右明嘉靖六年都御史姚鏌巡按石金建黃芳記今廢

嶺表書院在府治東南明嘉靖十一年都御史陶諧因總鎮府舊署改建霍韜記今廢

梧陽書院在城外東南明萬厯四十八年知府陳鑑建今廢

龍泉書院在桂江西岸山麓郡人石邦柱建今廢
蒼梧縣學舊在府學右後圯合祀府學

國朝康熙三十九年知縣潘名世教諭安自治訓導
黎民表合紳士各捐貲建於城東門內城隍廟西
規制未備五十八年知縣劉國臣捐俸率紳士重
建啓聖祠明倫堂雍正元年建兩廡戟門櫺星門

名宦鄉賢祠又奉文改換崇聖祠額添造神牌祭
器七年知縣李振宗修櫺星門及明倫堂
忠義祠在縣學宮內節孝祠在大南門外

國朝雍正元年知縣劉國臣如式建造

學田原額三頃三十五畝六分有奇共徵租銀一
十七兩六錢九分有奇又店舖十一間徵租銀七
兩七錢四分零

附義學在大南門外西原係府義學舊址康熙五

十七年知縣劉國臣修建邑人李世瑞建尊文閣
於其後

藤縣學在縣南門外學嶺之麓元至順三年知州
文魁建元統二年建書樓三間至正七年置祭器
明洪武七年州同知金文仲重建正統十二年知
縣馮哲修天順六年知縣謝鉉重建弘治十年知
縣廖佐重修又建兩廡戟門十七年提學僉事姚
鎮委官增修堂宇齋舍嘉靖六年典史孫懋重修

二十三年知縣顏參修明倫堂隆慶四年知縣司鑑增置祭器書籍萬厯二十八年知縣劉炅改建於舊址西五十步四十三年知縣李廷幹從諸生請遷復舊址天啓五年知縣曾鳳彩建文昌閣於學東崇禎三年署縣事經歷葉大紳修戟門八年知縣梁昌重修明倫堂文昌閣

國朝康熙四十一年署縣事本府通判張一祥重修明倫堂四十四年知縣潘明祚修明倫堂大門儀

門四十八年知縣張純重修聖殿五十八年知縣
陳士修重修戟門啓聖祠鄉賢祠雍正元年知縣
李文炎奉文改換崇聖祠額添設神牌祭器八年
知縣李郁芬修兩廡教諭呂德懋訓導梁松修櫺
星門宮牆

忠義節孝二祠在縣南

國朝雍正二年知縣李文炎建

學田四頃四十八畝七分零在古仙埔共租銀三

十五兩內除荒田二頃一十二畝八分零實徵收
熟田租銀一十八兩三錢七分有零

三元書院在城西宋馮京讀書處明景泰元年僉
事湯性方草創三年知縣唐禮重建並買旁地以
廣之弘治七年知縣廖佐復建樓堂以祀文簡公
教諭周琳記萬歷九年奉勘合鬻為民居別建永
安門內今改為義學

解元書院在仁封鄉赤水鎮原為三界祠舊址明

嘉靖元年提學劉節改建有記今廢

南麓書院在縣學東北隅明嘉靖九年典史孫懋
建萬厯六年知縣陳雅言重修萬厯間火崇禎九
年知縣梁昌重建今圯

附義學即三元書院舊址改創

容縣學唐貞觀元年建於駱駝橋西宋自紹興以
來遷徙無常開禧間教授梁汝翼修葺有記元遷
縣治西南明洪武二年州同知王清因舊址重建

正統間訓導蕭成建興賢育才二坊景泰五年知縣黃佐重修殿廡戟門厨庫泮池成化十六年知縣林廷輝建櫺星門饌堂明倫堂及東西二齋弘治間知縣程哲文重修嘉靖十年知縣蔡雨改建學宮規制復新知縣秦行賓嚴春化相繼修建名宦鄉賢啓聖祠萬厯四年知縣萬一龍七年知縣伍可受重修鍾繼英記四十八年知縣區龍正復修嘉靖萬厯間訓導梁佩陳心學增置祭器

國朝康熙五十四年知縣蘇霖泓重修殿廡門牆啓
聖名宦鄉賢三祠及明倫堂雍正元年知縣楊肖
億奉文改換崇聖祠額添造神牌祭器

忠義祠在明倫堂側節孝祠在學宮西

國朝雍正三年知縣周釋建六年知縣王澍霞補建
學田六頃三十畝零在波辛水三里租銀一十六
兩三錢五分零除荒四頃二畝六分零現徵熟田
租銀九兩二錢八分零

繡江書院在縣治西久圯

國朝康熙二十九年知縣李瑞徵改創兼設義學

勾漏書院在縣治東邑人公建以祀宋安撫機宜
吳元美今廢

南山書院在儒學左即思賢堂舊址明萬厯四十
六年知縣侯應遴改建今廢

附義學即繡江書院康熙二十九年知縣李瑞徵
改設

社學城鄉共五十所

岑溪縣學原在舊縣治東唐武德五年建宋元因之明洪武十二年教諭何進重建弘治三年知縣勞雍遷建今縣治東北隅教諭蔣聰續成之正德十六年知縣石希介訓導劉材義遷於子城城隍廟西嗣後遷建無常嘉靖十七年知縣熊壺復遷城內四十年火署知縣張子翼修復萬厯二十二年知縣徐一文改建於城東二十八年知縣曾革

重修三十三年以地震圯知縣吳繼禧修復天啓
元年知縣詹子忠復自外徙城內縣治後營建殿
廡堂祠亭池門舍規制如初崇禎十二年知縣盧
日就建啓聖祠

國朝順治十五年知縣劉廣國修建明倫堂康熙八
年知縣劉昌言重修殿廡鄉賢祠明倫堂四十三
年知縣張義修殿廡鄉賢祠雍正元年知縣富鴻
業奉文改換崇聖祠額添造神牌祭器

忠義節孝二祠在學宮側

國朝雍正二年知縣劉信嘉建

學田二頃二十三畝四分零徵租銀四十九兩零
文昌書院在學宮後明崇禎十二年知縣盧日就
建

國朝康熙四十三年知縣張義修

文公書舍在大洞福隆圍縣中士人公建祀昌黎
韓公高熊徵記

附
社學六一在城北五在鄉村

廣西通志卷三十七

欽定四庫全書

廣西通志卷三十八

學校

南寧府

府學在府治北舊在城外沙市後徙城中南隅址
凡數易宋遷城西寶慶丙午安撫使謝守明遷於
城中五花嶺即今學淳祐戊申督學使梁應龍重
修鄧容記元宣慰使趙修己重修文璧記明洪武

三年署府事焦源教授謝成伯重修正統間知府
陳鼎完舊益新修殿廡講堂齋舍塑聖賢像造樂
器弘治間郡守蕭蕙劉芳正德間李津相繼修飾
中為聖殿兩翼為東西廡前為戟門又前為櫺星
門左右為四齋曰志道據德依仁游藝門有半月
池護以石欄障以屏牆有箴亭射圃公廨嘉靖間
知府郭楠朱黼王貞吉先後重修規制悉備又於
戟門左建文昌祠兵燹後僅存櫺星戟門正殿文

昌祠餘俱圯

國朝康熙四年知府虞宗岱同知劉光榮倡修明倫堂雍正元年左江道靳治齊於學宮之東創建崇聖祠五間奉換祠額添設追封五世王爵神牌並備祭器二年知府慕國璵捐修正殿及兩廡又府學名宦鄉賢向附於兩廡知府慕國璵於兩廡下捐建名宦鄉賢二祠各三間十年知府張漢重修大成殿及兩廡鄉賢名宦各祠并捐貲置祭器樂

器有碑記

數文書院在府城內北即縣學舊址明嘉靖七年
新建伯王守仁建萬曆十一年兵備道陳紀修明
末燬基址為兵舍

國朝康熙九年分巡道宋翔知府韓章修復之

東泉書院在府城內明嘉靖六年建祀督府東泉
姚公鏌歲久頽圯四十二年知府方瑜移奉東泉
公像於數文書院與王陽明並祀

東郭書院在府城東一里明嘉靖二十九年知府王貞吉以千佛堂改建今廢

西郭書院在府城西一里明嘉靖二十九年知府王貞吉即崇善寺改建今廢

中郭書院在府城南五里明嘉靖二十九年知府王貞吉因堡平廢寺修建今廢

宣化縣學明洪武三年建於城之西北正統二年御史唐慎改遷城內十一年知縣盧彰重建塑聖

賢像正德十六年知府盛灝重建堂齋門舍嘉靖
八年遷附府學之右文廟總於府學十年更定如
府學制二十九年知府王貞吉重修萬厯四十年
知府蔡淑達重修有記後兵燹圯廢春秋致祭仍
附府學

國朝順治初年復建康熙三十八年知府孫明忠知
縣白洵重建殿廡戟門啓聖祠及名宦鄉賢祠明
倫堂四十九年知府戴錦知縣吳澄建櫺星門宮

牆下馬牌濬泮池五十年知府戴錦知縣吳澄修
大成殿啓聖祠雍正元年奉文改換崇聖祠額添
設神牌祭器八年知縣黃其炳重修殿廡

忠義祠在城內西門節孝祠在忠義祠右雍正三
年知縣趙成章奉文卽式南修和二書院改建五
年知府黑天池署縣事新寧州知州徐德秩俱重
修

學田一頃二十六畝額徵租銀一十二兩五錢

附義學在城內西

國朝康熙五十五年知府沈元佐建雍正五年知府
黑天池署縣徐德秩修

社學五所明嘉靖間建今廢

隆安縣學明嘉靖十六年知縣章珪建在城北三
十九年知縣姚居易遷於城東郊有記四十二年
知府方瑜捐貲續成學制乃備萬厯十四年毀於
潦知縣袁璧重修明末兵燹久圯

國朝康熙十一年知縣查繼甲倡建歲久頽圯十八年知縣史宗瓚二十二年知縣徐黃嗣相繼修葺二十五年知縣盛國俊捐修正殿戟門泮池鞏橋三十年知縣楊燮訓導李克成典史司朝常倡率紳士重修日久復圯五十八年知縣王輅同儒學紳士捐修正殿及兩廡雍正元年知縣趙瀚岸奉文改啓聖祠為崇聖祠添造神牌祭器六年署縣事新寧州知州徐德秩同教諭喻聖傳倡率紳士

捐修殿廡及名宦祠明倫堂八年知縣劉觀棟重建崇聖祠

節孝祠在西門內

國朝雍正二年知縣趙溯岸建

學田七十三畝三分額徵租銀三兩三錢九分零

附

社學明萬厯二年知縣何一麟在城內外共建

四十二處明季俱圯

國朝康熙二十五年知縣盛國俊於學宮側建社學

一所縣十里每里各建一所日久復圯雍正二年知縣趙瀚岸於西鄉六圖建復

橫州學在城外西崇儒坊舊為寧浦郡學建置無考元至元間達魯噶齊多爾濟重建張九垓記明洪武三年知州薛明理因舊址重建三十二年學正徐浩修宣德間知州郭交儀學正孔定建齋舍講堂景泰間知州曾文玉學正盧瑞建戟門兩廡櫺星門嘉靖十一年建啓聖祠敬一箴亭碑萬厯

二十九年署州事推官張邦教增置學田以贍貧士四十五年知州劉子誠遷學於北郭報恩寺崇禎八年復建於舊址

國朝順治十四年學正朱英重修雍正二年知州劉斌奉文改啓聖祠為崇聖祠添設神牌訓導張炳造祭器三年知州劉斌學正蒙銓訓導張炳重修殿廡門牆

忠義節孝二祠在州城中雍正二年如式建

學田三百畝零四分九釐零額徵租銀二十三兩三錢二分零

淮南書院在州西明正德間知州黃琮建今廢

豫庵書院在學右今廢

附義學康熙四十年知州柯宗仁建在馴象衛舊署雍正二年知州劉斌重建

社學在高登樂山從化北鄉四村雍正二年知州劉斌捐建

永淳縣學舊在江北明洪武三十六年知縣孫道源遷於江南崇禎間知縣姜大球復遷江北

國朝康熙二十一年知縣王心詰又遷建於江之南
二十五年知縣董學禮復遷江北今所四十四年
知縣徐鳳池建兩廡啓聖祠名宦鄉賢祠櫺星門
五十一年知縣萬晉豐修五十七年知縣凌森美
建明倫堂雍正元年知縣朱琰教諭唐幹重修奉
文改換崇聖祠額增造神牌祭器七年知縣朱肇

基修宮牆

忠義祠在縣治南雍正三年建

節孝祠在縣治西雍正三年修建

學田一頃六十一畝六分二釐零額徵租銀一十兩零二錢三分零外水一冬糧米一石三斗五升又舖三十五間徵租銀一十八兩魚塘一口徵租銀八錢河塘一口徵租銀七錢學前地徵租銀一兩

大同書院在城內南即舊童公祠明崇禎九年知縣容文煢改建今廢

大觀書院在城內今廢又縣署右徐公書院

國朝康熙四十六年士民為知縣徐鳳池建

騰蛟書院在城內明嘉靖十四年知縣方鵬建今廢

附義學在城南門內東偏

國朝康熙五十八年知縣凌森美建雍正四年知縣

朱琰遷建東門內

新寧州學明隆慶六年左江道霍與瑕開建州治
詳請建學卜城內東隅地創造殿廡堂齋門祠池
亭規制悉備歲久傾圯崇禎十三年知州王文林
重修兵燹復燬

國朝順治初重修康熙五十九年知州顧延琮修建
規宏舊制雍正元年奉文改換崇聖祠額添設神
牌祭器四年知州徐德秩重修殿廡及崇聖祠

上思州學明正德五年知州羅環請於督學選秀
士肄業南寧府學十一年署州事通判陳瑛始請
建學校次年頒儒學印記十三年知州黎磐建廟
於郭外之東嘉靖十三年知州陳世瞻遷城內東
隅二十三年知州周璞益恢前址三十一年燬於
兵三十二年署州事吏目蘭時習三十三年知州
詹世龍三十七年知州李時芳重修郭應聘記歲
久荒頽崇禎十六年署州事徐美修未幾復圯

國朝順治十六年知州高科署州事照磨葉汝懋康熙二十三年知州戴夢熊相繼建修正殿兩廡戟門櫺星門泮池橋啓聖名宦鄉賢祠明倫堂藏書閣規制大備雍正元年奉文改換崇聖祠額添設神牌祭器

節孝祠在州城內東雍正四年奉建

學田租歲納銀三十四兩八錢內除納回本州扣作丁糧外實額銀三十四兩四錢三分零支給貧

生為膏火資

附義學二所在州城東學宮左康熙二十三年知縣戴夢熊立

太平府

府學明洪武三十年知府陳惟德始建於城內北隅學宮卑隘後遷於城外東南向正統間知府蔣彥廣重建成化十二年知府何楚英重修丘濬記弘治十三年知府謝瑚遷東向正德間知府徐球

仍復舊地南向萬厯十七年知府張步雲重修
改東向後經江州賊燬

國朝順治十八年知府馬正午建尋圯康熙六年知
府高不矜重修三十六年知府徐越知縣王言再
修復圯五十八年知府王潯率通學捐貲重修雍
正元年奉文改啓聖祠為崇聖祠添設追封五世
王爵神牌及祭器

學田林村田一千地在左州林村氓月田氓月渡

頭田共五百五十地在崇善舊縣俱嘉靖中知府
徐師臯捐俸置那賴崗田二十五升匠驢田十二
升俱萬曆三年知府蔡迎恩捐俸置

靜庵書院在府城隍廟西祀前知府胡世寧

筆花書院在北門內西嘉靖二十一年為前叅政
翁萬達建

附義學雍正二年知府甘汝來建於高公祠前延
師課士

社學一十七所明知府周允建二所知縣何道臨
建一十五所

崇善縣學初選士肄業府庠

國朝雍正元年知縣周夢錦詳請興建規制粗具取
進生員四名武生四名撥府學訓導督課春秋丁
祭仍附府學

左州學明嘉靖八年知州周墨初建於州城北二
十七年戊申知州鄧體靜重修隆慶四年知州林

休建明倫堂名宦祠六年知州袁昌祚遷於城西
門外萬曆四十年知州蕭貽朔遷於城南門崇禎
十二年知州李之清復遷於城北舊地己丑交趾
犯境殘毀

國朝康熙六年知州紀振邊修復大殿二十五年知
州李拱極學正唐學益續修旋圯四十八年知州
李銓捐俸建大成殿兩廡泮池戟門櫺星門率皆
修葺後復傾圯六十一年知州羅士奎學正關士

勲倡通學捐貲仍遷建於城南門內雍正元年奉
文改換崇聖祠額添設神牌祭器四年知州王國
祚建名宦鄉賢祠六年知州趙宏印建明倫堂

學田原額一十七畝二分明萬厯二十七年巡撫
楊芳提學駱日昇知州方岱捐銀買置

養利州學舊在城外北二里明萬厯初知州王之
緒建二十七年知州劉夢齡遷入城西

國朝順治十八年知州傅天寵重修後圯康熙三十

二年知州汪溶日捐資重建雍正元年奉文改崇
聖祠額添造神牌祭器七年知州徐德秩捐修殿
廡及崇聖名宦鄉賢祠又同學正朱若遜捐資建
明倫堂

學田二十九畝額徵租銀八兩四錢七分零

附社學三所俱萬歷三年知州王之緒建今廢

永康州學明萬歷三十六年知州葉時敏建崇禎
九年知州李喬春重修

國朝康熙四年知州趙森重修十四年災二十一年
知州吳尚庚重建未竣罷任去二十五年知州許
延邵學正謝明英率通學生員張炳等捐貲重建
復毀四十五年知州徐樹庸捐貲重建殿廡未竟
五十八年知州李秀發捐俸倡衆重建雍正元年
奉文改換崇聖祠額添設神牌祭器四年知州江
莪八年知州朱掄學正曹維翰訓導蔣尚潔各捐
資重建崇聖祠及明倫堂

學田一百畝在懷隴係思同土州養膳田明萬厯三十六年知州葉時敏詳請入學以六十畝歸兩齋教官以四十畝分給八名廩生為膏火資

麗澤書院在城內

國朝康熙二十七年知州許延邵建今廢

附義學在儒學署後

國朝雍正二年知州江義修建

社學在城內明萬厯三十六年知州葉時敏設

寧明州學在明江城即思明土府學明萬厯二十七年同知王一岳土知府黃承祖建三十三年同知蘇日登條議修學並出貲以佐三十七年叅議劉庭蕙同知朱鳴時相繼修建年遠頽圯

國朝康熙九年同知王之仕蕭如芝相繼修建康熙二十八年同知陳達土知府黃維鼎教授高熊徵重建雍正元年奉文改換崇聖祠額添設神牌祭器雍正十一年改州學

學田明土官黃承祖抄沒叛目陸祐以所有田塘
歸學並無頃畝

太子泉書院在明江城西門外明永樂間土知府
黃廣成建解縉謫交趾嘗於此與廣成賦咏結歡
今廢

南陂書院在明江城内

國朝康熙二十九年教授高熊徵建

附
太平土州學

國朝雍正二年土知州李蕃建於城西霸嶺殿廡門
牆崇聖名宦鄉賢祠明倫堂規制咸備

鎮安府

府學在城內東北隅

國朝康熙七年通判彭權創建雍正九年知府孔傳
堂修葺正殿兩廡櫺星門增建崇聖祠繕書殿額
附義學在府署西

歸順州學州經改土設流現議興建

節孝祠在州署左

國朝雍正五年建

奉議州學

國朝雍正二年州判程旦建

學田三十畝額徵租銀一兩二錢

附義學在州署西

國朝雍正五年州判邵銓建

附上映土州義學三間在州署東久建歷年土知

州延師捐給脩脯

下雷土州義學在州衙左

國朝雍正元年創建

柳州府

府學創自唐初元和間刺史柳宗元重修有記明
洪武六年同知莫玉以地湫隘弗稱徙府治西北
隅永樂五年推官陸楷等重修未就知府馬應坤
續成之宣德四年推官鄭士庶改禮殿及講堂門

廡齋舍廨宇庖湍皆備有記天順元年知府龔遂
增建後堂及東西齋陳邦琳記弘治間知府周欽
作石橋於泮池上關射圃於學東嘉靖間知府鄧
鉉王三接重建後圯崇禎二年知府胡世儁重修
有記明末兵毀

國朝康熙間守道黃惟鋐知府劉永清重修十九年
燬知府江皋草創之二十四年巡道周訓成捐修
兩門二十七年巡道唐宗堯知府張曰任相繼修

萬五十二年知府趙世勲修大成殿五十七年知府黃之孝重修規制始備雍正二年署巡撫韓良輔改修啓聖祠為崇聖祠添造追封五世王爵神牌捐置祭器

馬平縣學前代止有路學至明洪武間縣丞唐叔達始建於城外羅池街東弘治九年知府李文安重建嘉靖六年知府胥文相繼修殿廡戟門堂齋十六年知府鄧鉉建敬一亭三十一年知府顧需

推官徐仲相重修四十年巡按御史高應芳檄同知任宇知縣張集重修有記明末兵毀

國朝康熙五年守道戴璣知縣閻興邦鼎建十九年燬二十二年知縣金人望復建以憂去其後知縣朱廷銓王言相繼完葺四十二年知縣台聯甲復修五十三年大水衝塌僅存大殿五十七年知府黃之孝修明倫堂五十八年知縣高元貞修啓聖祠雍正三年巡撫李紱提督韓良輔布政使黃叔

琬按察使甘汝來巡道喬于瀛知府王國垣知縣
楊為棧公捐鼎修併改啓聖祠為崇聖祠添設神
牌祭器

忠義節孝二祠

國朝雍正三年建造

學田原額二頃一十三畝零額徵租銀一十一兩
五錢零

同仁書院在縣舊址明成化丁未巡按御史李廷

珍建今廢

駕鶴書院在城東駕鶴山今廢

附義學在城內

社學在城東

雒容縣學舊在城北遷城東南宋季燬元至元間
重建元末復燬明洪武六年知縣李仁遷於縣治
西成化間修建正德十五年燬萬曆三年遷縣重
建知縣樊于震鄧林春先後經營十三年推官李

遠成之明末復燬

國朝康熙二十二年知縣林世定訓導唐聖輔倡集
紳士重建雍正元年奉文改崇聖祠額添造神牌
祭器

忠義節孝二祠在縣治西雍正二年建

羅城縣學舊在縣東鳳凰山前明洪武三年知縣
杜原建四年縣丞于志祖續成之明末遷城內東
北隅尋燼於兵

國朝順治十五年署縣事苗爾蔭草創於舊址康熙
元年知縣于成龍重建於東門外三十六年知縣
王永清修兩廡啓聖名宦鄉賢祠四十一年知縣
趙瑞晉重建啓聖祠明倫堂雍正二年奉文改換
崇聖祠額添設神牌祭器
節孝祠在縣東城內

國朝雍正二年知縣徐恪遵建

學田原置七頃五十八畝零每畝科租不等共銀

一十三兩零四釐納糧免差起解學政康熙四年
知縣于成龍查清畝數坐落立石垂後額徵租銀
二十四兩

附義學在鄉賢祠下

國朝康熙五十七年知縣王斗樞建

柳城縣學原在龍江舊城明洪武三年縣丞陳祖
政遷於縣治西南十八年知縣張志諒永樂七年
知縣聶盟先後修理成化間知縣余書遷城內北

隅十四年督學吳玉命遷縣治東正德六年知縣
許珊重建堂廡戟門嘉靖五年推官馮來駿遷建
今基署縣事通判蕭鼎繼完其功明末兵燹頻仍
僅存遺址

國朝康熙二十年知縣駱斯才重建三十年知縣彭
士櫨重修六十一年知縣蘇潮修兩廡戟門櫺星
門雍正三年知縣丁文麟奉文改換崇聖祠額添
造神牌祭器七年知縣周之瑚修十年知縣楊恒

捐建明倫堂三間儀門一座凡殿廡牆垣復皆修整

忠義節孝二祠在學宮左

國朝雍正四年署知縣李振宗建

學田一項二十四畝八分零額徵租銀四兩一錢零

融縣學宋建於真仙巖之前乾道三年郡守劉襄重修淳熙間郡守張适修禮殿嘉熙丙子郡守韓

休卿遷下郭驄馬坊蔡安國記元至正間燬於兵
明初建於橋頭嘉慶坊正統十一年知縣嚴霜遷
於西城內朱指揮宅地正德元年知縣吳清十五
年知縣曾俊先後修造嘉靖四十一年署縣謝紹
祖始建啓聖公祠教諭朱應畿記萬曆九年教諭
蔣行可訓導何元佐建明倫堂四十年鑿泮池邑
人王法記明末燬於兵

國朝順治十八年知縣吳守茲重建康熙二十年知

縣熊飛渭重建殿廡王如辰記二十七年知縣張
廷柱教諭蔣俊修啓聖祠三十二年知縣梁廷桂
教諭毛三鱣建宮牆五十年知縣吳從龍重建戟
門五十四年知縣牛天宿遷明倫堂於大殿後五
十五年署縣佟世英修正殿及櫺星門五十八年
知縣張元正教諭唐宜甲重建戟門五楹雍正元
年奉文改換崇聖祠額添造神牌祭器八年知縣
陸嘉謨教諭文奕遠訓導歐繼表重修正殿宮牆

鄉賢祠

忠義節孝二祠在學宮左側

國朝雍正五年知縣劉克一建

學田一十畝九分零額徵租銀三錢三分零地一
所在橋頭嘉慶坊

真仙書院在真仙巖宋守李興時建久廢

正心書院今廢

懷遠縣學在縣治東明萬厯中遷縣時知縣蘇朝

陽建兵燹後圯廢

國朝康熙五十二年知縣張廷超修建大成殿東西廡名宦祠五十四年知縣王楫修啓聖祠雍正元年奉文改換崇聖祠額添造神牌祭器七年知縣陸嘉謨修明倫堂八年知縣粘鼎玉教諭謝之炯訓導李良相修建戟門櫺星門泮池宮牆

節孝祠

國朝雍正五年知縣王景獻建

學田一十四畝三分零徵銀四兩二錢

附社學在古宜甲雍正二年知縣陳鎮建

象州學唐大厯十二年建在城外東南隅明洪武
二年增拓東城儒學在城內同知李永修建永樂
間知州朱良弼余存諒相繼修葺宣德十年燬正
統五年巡按御史朱良暹屬知州何敬重建嘉靖
十二年知州林益建明倫堂二十三年署州事陳
陵建啓聖祠未就學正霍桂成之祠尋圯二十四

年知州吳必學重建後廟祠俱圯萬厯四年知州謝一楓重建十三年兵巡道郭集知州李維岳捐俸重修

國朝康熙四十九年知州張天訓修大成殿兩廡戟門櫺星門啓聖名宦鄉賢祠雍正元年改換崇聖祠額增造神牌祭器三年知州陸廷光修明倫堂五年學正蕭禮讓重修宮牆

學田四頃一十二畝租銀二十八兩三錢二分零

附義學在城內西雍正二年知州徐德秩建八年
知州陸塚修未竣調任知州孫嵩捐貲完工立有
碑記

來賓縣學舊在縣東南宋開寶中建元季燬於兵
明洪武三年縣丞孫仕安訓導權明孫重修嘉靖
十四年知縣王璣重建堂齋後燬

國朝康熙八年署縣事王國章捐俸遷於城北九年
知縣王紹祖修偽逆變亂傾廢二十九年知縣張

震捐俸重建雍正元年奉文改換崇聖祠額添造
神牌祭器二年知縣郭拱極重修明倫堂

學田一項七十一畝零在大田等村離城四十里
額徵租銀二十兩零二錢零

附義學在城內

國朝雍正八年知縣吳逢年建

慶遠府

府學宋慶歷三年始建在城南崇寧三年立石鐫

辟雍詔於廡下淳熙四年知州事韓璧始遷於城
內開國坊張栻記慶元二年知州事陳表臣置學
田以助養士六年知州事耿明撤而新之又建閣
於堂後陳涇記後燬於兵久未建復明洪武初通
判王毅重修堂齋正統十二年知府楊禧重建始
鑿泮池天順八年知府周一清重建乃廣其制立
題名及建學碑陳文記成化二十一年知府馬駟
弘治三年知府汪溥相繼修葺十二年知府姜瑄

修殿堂齋廡重建號房廨宇明末燬

國朝康熙六年知府趙開雍重建舉人鮑傑生員江
元載捐貲成之後經逆寇焚燬二十三年知府白
啓明倡率紳士捐貲重建正殿兩廡及名宦鄉賢
祠四十三年知府焦映漢率各屬官重修雍正元
年奉文改啓聖祠為崇聖祠添造追封五世王爵
神牌祭器八年知府徐嘉賓同知錢志和重修殿
廡崇聖名宦鄉賢祠及明倫堂

學田三十畝每畝租銀五分共徵租銀一兩五錢
龍谿書院在西門內宋嘉定九年權州事張自明
因太史黃庭堅謫宜時僦居於此即舊址建祠塑
孔子顏仲像創講堂上為魁星閣東西翼以十室
為齋四曰共學適道與立與權前為重門有池曰
墨池亭曰寶華延師授徒捐貲置田以贍焉有記
今廢田亦無考

四賢書院在東門內舊為東嶽祠明嘉靖二年知

府王顯高改為書院祀宋呂璣趙抃黃庭堅馮京
龍江書院在城中大街

國朝康熙五十六年知府高茂選建有記

宜山縣學在府學西宋淳熙十年知州趙與榮修
元搖賊為亂久廢明洪武三年縣丞張叔廉重建
天順間知府周一清撤而新之尋圯弘治六年知
縣任球重修十二年知府姜琯知縣李謚續修正
德元年知縣徐志道縣丞胡通七年知縣金麒求

相繼修葺堂齋立科貢題名碑明末毀廢春秋二
祭皆附府學

國朝康熙四十七年知府李世仁知縣陳學海重修
殿廡門牆祠宇

忠義祠在東城外節孝祠在城內水井塘

國朝雍正三年知縣傅峻建

學田一十五畝每畝租銀四分共徵租銀六錢

附義學在東門內雍正十一年知縣陳謨修

河池州學弘治十七年知州何昱學正張翰建嘉靖五年知州周鉞移州治重建聖殿明倫堂於州治西萬曆九年知州梁紹震重修止茅屋三楹

國朝康熙六年知州王玉慶遷於州治後北山椒開泮池於山麓左右兩廡啓聖祠明倫堂皆備尋圯二十三年知州劉安國重建三十三年知州黃志璋建啓聖祠復俱圯雍正元年奉文改換崇聖祠額添造神牌祭器七年知州陳舜明捐貲重建殿

廡門牆崇聖名宦鄉賢祠明倫堂俱皆煥然一新
學田在下里共一十二圩額徵租銀一十兩

附義學在學宮前

國朝雍正四年知州陳舜明捐建

天河縣學原在縣西元末廢於寇明洪武五年縣
丞王居禮創建七年訓導喻遷善徙東禪寺側正
統七年署縣事照磨何政始遷於今城北地重建
殿廡門堂齋舍景泰三年燬成化二十三年知縣

楊榮修葺正殿重建堂廡齋舍規制復新弘治間
知縣史玟正德八年知縣魏朝陽十五年知縣尚
汝弼先後修葺崇禎六年知縣楊文煥重修日久
頽圯

國朝順治間僅修蓋茅舍尋燬康熙二十四年知縣
黃汙捐俸建大成殿三間雍正元年知縣吳鍾芬
重建兩廡櫺星門奉文改換崇聖祠額添造神牌
祭器諸制煥然一新規模始備

學田十畝額徵租銀四錢

恩恩縣學在縣城南門外明萬厯三十六年知縣楊天啓創建崇禎十七年燬於兵

國朝康熙二年知縣翁世庸仍舊址捐建復殿廡門牆啓聖名宦鄉賢祠及明倫堂八年知縣謝銓修甲寅後荒圯二十三年知縣鮑復相捐俸修建雍正元年奉文改換崇聖祠額添造神牌祭器三年知縣梁楷訓導何文煜修兩廡戟門崇聖名宦鄉

賢祠併移建明倫堂六年知縣林協訓導何文煜
修櫺星門濬泮池築宮牆

東蘭州新改土歸流現議建學

荔波縣

改隸
黔省

原未立學

國朝康熙二十一年知縣劉蔡申明捐貲建學於南
門內復設義館教訓苗童尋圯四十七年知縣岳
維重建雍正二年巡撫李紱

題准設學知縣蘇潮捐建仍換崇聖祠額添設神牌

祭器三年修葺殿廡祠堂

義田租銀八十九兩米十石禾六百六十秤布二十件康熙二十一年知縣劉荼募墾撥給義館生徒

思恩府

府學舊在府治南明正統十二年土知府岑瑛建萬節記嘉靖八年徙府治遂改建於城外南郊一里萬歷六年知府侯國治遷建於城內府治東即

今學殿廡祠堂及教授署無不咸備天啓四年知府葛中選建櫺星門

國朝康熙十一年知府金夢麟建名宦鄉賢二祠五十六年知府趙完璧重修殿廡戟門明倫堂雍正元年知府戴朝選重修大殿明倫堂奉文改啓聖祠為崇聖祠添設追封五世王爵神牌并造祭器學田一十八畝塘二口額徵租銀共四兩

陽明書院在府治西明萬厯間知府侯國治建今

廢

附義學在南門外

國朝雍正元年知府戴朝選修

武緣縣學唐武德中建宋天聖九年重修明洪武

二年建於城外南壽寧寺右宣德九年知縣黃宗

廣建明倫堂正統八年縣丞封純景泰三年縣丞

梁晚昌教諭譚經前後修建弘治十七年燬正德

二年御史顏頤壽遷城內南街十五年知縣姚明

誠重修自遷學後武緣科目久缺嘉靖十二年知縣馬汝頤復遷南門外撤壽寧寺為之二十五年知縣鄧體靜復遷寺右舊址四十一年南寧府知府方瑜委署印經歷徐思教諭鄭豫夫修葺議者以方向有偏故人文終不如弘治前隆慶元年通學以遷向狀呈巡按御史朱炳如知縣楊大韶合紳士復新之萬厯十二年知縣鄭學醇重修四十年知縣李先春移建於北門城內

國朝康熙三十九年知縣劉以貴捐修啓聖祠四十
九年知縣孫兆奎重修殿廡雍正元年奉文改換
崇聖祠額添造神牌祭器二年知縣王尅修明倫
堂

忠義節孝兩祠

國朝雍正三年知縣王尅遵建於學宮內外

學田原額田塘稅畝通共一頃二十三畝零除荒
外實徵熟銀六兩二錢零

附
義學在縣署東

國朝康熙五十五年署縣事王琳捐建

社學明隆慶初知縣楊大韶建五所後俱圯

國朝雍正三年知縣王勉捐建八年知縣艾光紱捐
修

賓州學在州南元皇慶中判官陳應建泰定乙丑
知州王渥置祭器王廷誘記至正末燬明洪武二
年知州馮榮周樂相繼修建正德八年兵備副使

陳錫分巡僉事徐海重修隆慶萬厯間兵備副使
鄭一龍郭棐先後重建明末燬

國朝康熙四年知州呂陳亮重建尋圯二十一年知
州余忠震重建四十八年知州胡范修明倫堂五
十七年署州事范從益同州屬紳衿捐貲修葺雍
正元年奉文改換崇聖祠額添造神牌祭器

忠義節孝二祠

國朝雍正元年知州甯鴻佐建

學田二百九十一畝在安城額徵租銀二十一兩二錢

敷文書院在州治左明嘉靖七年建今廢

遷江縣學在縣西明洪武三年建二十三年燬知縣梁護重修永樂五年重建復燬知縣梁蠡復修規制畧備後圯

國朝順治九年知縣高際運改建於城中覆以茅草康熙八年知縣李如華易以瓦并建東西兩廡及

戟門經逆兵殘燬二十一年知縣曹雲鵬捐俸修
整殿廡又建啓聖祠雍正元年奉文改換崇聖祠
額添設神牌祭器八年署知縣黃士昇捐俸重修
學田一頃一十四畝五分額徵租銀一十二兩四
錢零

上林縣學在縣署南古澄州門內明洪武三年縣
丞周偉重建弘治間知縣向龍重修嘉靖九年知
縣方田拓地增建萬厯元年知縣王一岳重修歲

久圯壞

國朝康熙四十三年知縣張邵振捐俸重建四十八年知縣田淮重修規制乃備雍正元年奉文改換崇聖祠額添造神牌祭器

學田二十四畝額徵租銀三兩二錢

附義學舊在城北郊久圯康熙四十八年知縣田淮於學官右空地捐建義館一所

附田州土州學

國朝雍正二年土知州岑應祺詳請捐建殿廡門牆
池坊咸備又建崇聖名宦鄉賢祠

義學在州署東

國朝康熙六十年土知州岑應祺建

泗城府

府學在隔江西岸

國朝康熙二十年土知府岑繼祿建雍正元年奉文
改換崇聖祠額添造神牌祭器

附義學向未設

國朝雍正八年知府祖良範建於府治大街

西隆州學

國朝康熙五十年知州陳大革捐建

西林縣學在縣署東

國朝雍正二年知縣孫來賀建

附義學

國朝康熙二十二年知縣唐如則建雍正七年署縣

事張以仁修

直隸鬱林州

州學舊在州治南一里宋至道二年建元至正三年知州張阿勒坦巴哈遷建今州治西南成賢坊地別多喇卜丹記明洪武二年州同知王彬重修正統七年知州柴衡建明倫堂立題名碑曾才魯記十四年知州廖震建殿廡堂齋成化四年知州向珍修弘治十二年知州李永珍修彭甫記正德十一

年州人梁璉易櫺星門以石十六年兩廡傾圯知
州張詔修建隆慶二年州同闕繼禹重修萬曆十
三年知州江龍重修十九年副使蘇濬修啓聖諸
祠堂後築方塘低窪前拓地為泮池浚西北之泉
入焉明季圯燬

國朝康熙二年知州馬有用因舊址修建正殿兩廡
戟門啓聖祠二十五年知州賈有福重修正殿兩
廡啓聖祠復建明倫堂周以土垣五十二年知州

邵超修正殿戟門啓聖祠鄉賢祠五十五年學正
李棧修明倫堂雍正元年奉文改換崇聖祠額添
造神牌祭器

忠義節孝二祠

國朝雍正二年署知州蕭烜光建學宮內外

學田四頃八十畝八分九釐在西岸離城二十里
共徵租銀三十一兩二分零

興文書院在州治前明萬曆二十四年改建為提

學道行署後圮

附社學六所分設西南二廂東寧撫康貴平富民
四鄉

博白縣學唐貞觀初建於城南一里宋開寶五年
遷城東一里紹興後圮慶元戊午知縣李大章重
建曾丰記明洪武三年縣丞孔時郁建正統元年
縣丞朱勗主簿張本忠重修七年知縣程節遷縣
治南成化四年寇燬副使范鏞遷於平政門外嘉

靖六年教諭柯挺之申請遷於城東舊址四十三年署縣事藤縣縣丞王宗予遷建城內縣治西廟制咸備萬厯十五年知縣謝國光重修三十七年知縣譚岳重修四十八年建尊經閣知縣張茂芹署縣同知陳熙韶繼成之

國朝康熙三年知縣史縉重修十三年寇燬惟聖殿兩廡存三十二年署縣事鬱林知州黃暉烈建啓聖祠四十五年知縣趙世功修四十八年知縣程

鑣捐俸倡率官僚紳士節次重建戟門櫺星門明
倫堂敬一亭開泮池築四周垣牆五十六年知縣
王之麟重建改正南向雍正元年知縣蕭烜光重
修復奉文改換崇聖祠額添造神牌祭器七年署
縣事孫嵩補修

忠義節孝二祠

國朝雍正二年知縣蕭烜光建

學田一頃五十七畝三分零在西鄉離城七十里

共租銀一十四兩一錢零內除荒一十三畝二分
現徵熟田租銀一十二兩九錢七分零

養正書院在縣治分司東今廢

附社學二所一在城隍廟一在文星橋

北流縣學唐貞觀三年建於登龍橋西元大德二
年知縣侯仁遷寶圭驛東至大二年主簿吳天質
建殿廡延祐四年知縣羅天祐遷於驛西至正二
十六年燬於火遷縣治西南一里明洪武十一年

知縣陳天文仍舊址重建天順四年寇燬成化七
年都御史韓雍改築城池以學基建縣治而建學
於縣治東北隅弘治五年知縣羅嵩遷城東一里
十年知縣曾源重修周孟中記嘉靖十三年知縣
彭黼復遷城內縣治東北後再徙城外東崇禎四
年知縣劉修已仍遷城內舊址

國朝康熙元年署縣事安九埏復遷建於舊址明倫
堂右七年知縣王德淑建名宦鄉賢二祠二十五

年知縣尚國正邑紳陳廷藩建啓聖祠明倫堂五十七年知縣遲之金重修正殿及兩廡門牆名宦鄉賢二祠雍正元年知縣袁宗佺奉文改換崇聖祠額添造神牌祭器

忠義祠在崇聖祠旁節孝祠在城隍廟右

國朝雍正二年知縣袁宗佺建

學田七十八畝七分二釐在西河離城一里額徵租銀一十三兩七錢二分有奇又康熙元年署縣

事安九埏捐貲另置田共米五石六斗遞年納租
入學原係民糧仍在縣徵收

養正書院在城東舊學前明同知施宗誼建久圯
起潛書院在學校北今圯

附義學在東門外

國朝雍正三年知縣劉興第建

社學在波一里

國朝康熙四十四年知縣陳獻德建

陸川縣學宋淳化五年建於城東南一里明洪武
三年縣丞王麟仍舊址重建永樂十二年知縣吳
景修天順六年知縣李瑄遷於南門內縣治東弘
治四年提學僉事周孟中委官遷建於縣中街西
正德七年賊毀知府曹琚重修嘉靖二十三年知
縣李綽遷於縣南一里四十三年知縣張子翼遷
城北鼎新廟制萬厯十四年知縣林鳳朝重修明
末兵毀

國朝順治十六年知縣周士選重建殿兩廡戟門櫺
星門康熙四年知縣方鼎重建明倫堂四十三年
知縣熊淑媚重修明倫堂雍正元年知縣蘇名弼
奉文改換崇聖祠額添造神牌祭器三年知縣謝
錫侯捐修正殿

忠義節孝兩祠在學宮側

國朝雍正三年知縣謝錫侯建

學田一頃九十二畝三分二釐在沙湖堡離城三

十里共徵租銀九兩五錢六分零

附義學在明倫堂後

國朝康熙四十三年知縣熊淑媚修建

社學一在南城外一在北城外一在城隍廟後雍

正三年知縣謝錫侯新建社學三所俱在城外堡

興業縣學宋慶厯中建於縣西北一里後圯元至

正三年知縣秦仁濟因舊址重建明洪武三年縣

丞鄔馬兒修二十四年知縣余顯宗重修正統天

順間知縣丁芹向珍相繼修葺建奎文閣後以寇燬成化十八年訓導陳士章申請督撫發帑檄知縣鍾轅遷建城內縣治東弘治正德間知縣王昌陳濬重修嘉靖十六年知縣方詔復修李義壯記二十五年邑紳譚堯道重建櫺星門萬厯十年知縣馮文照修大成殿十二年知縣曾節續成之崇禎十五年攝縣事通判鄧來麟倡修殿廡堂齋邑紳譚汝賢重建敬一箴亭

國朝雍正元年奉文改換崇聖祠額添造神牌祭器
三年知縣栢宏智重修殿廡門牆崇聖名宦鄉賢
三祠及明倫堂

忠義節孝二祠在學宮左右

國朝雍正三年知縣栢宏智建


學田八十一畝二分零現徵熟田租銀八兩五錢
五分零

附
義學

國朝雍正八年知縣夏暄建

社學舊有八所後廢

國朝雍正三年知縣栢宏智捐建四所



廣西通志卷三十八